


# KrEUIZE



rondzendbraif

of

[www.kreuzekeuze.nl](http://www.kreuzekeuze.nl)

NUMMER 29

meert  
2011

*verhoalen  
gedichten  
verskes  
níjs*

allènt  
in  
t Grunnegs



Vrij rond te sturen

noar elkenain

dij t lezen wil.

# KREUZE nummer 29

6e joargang

2

**redaksie:** Jan Blaauw (tekst)  
Henk de Weerd (opmaak)

**Redaksieadres:** Verl Oosterweg 33  
9804RD Noordhorn  
tel. 0594-503095

**Stroombraifkes:**  
[jan@kreuzekeuze.nl](mailto:jan@kreuzekeuze.nl)  
[henk@kreuzekeuze.nl](mailto:henk@kreuzekeuze.nl)

*Vrij rond te sturen; nait zo mor wat overnemen van schriefster/schriever*



Op de webstee [www.kreuzekeuze.nl](http://www.kreuzekeuze.nl) binnen ook de veurege ofleverens te vinden. Krieg je hom mor nait te pakken? Kin wezen dat flash player nait installeerd is. Goa noar : [http://www.adobe.com/shockwave/download/triggerpages\\_mmcom/flash.html](http://www.adobe.com/shockwave/download/triggerpages_mmcom/flash.html) en de computer regelt t veur joe.

KREUZE 30 komt oet begun maai Biedroagen kin j'opsturen tot 24 april 2011

## INHOLD:



|   |            |
|---|------------|
| Hoera, de koegel is deur de kerke !           | 3, 4       |
| George Petzinger                              |            |
| Gedichten                                     | 4          |
| Bertus Spelde                                 |            |
| Gloepenshaard                                 | 4          |
| Klaas van Zonneveld                           |            |
| Zeekoap                                       | 5          |
| Roel Sanders                                  |            |
| Mien wicht                                    | 5          |
| Harm D. Guikema                               |            |
| Gedichten                                     | 6          |
| Edo Staal                                     |            |
| n flezze cognac                               | 6, 7       |
| Trijnko Pelgrim                               |            |
| Gedichten                                     | 7          |
| Harm D. Guikema, Roel Sanders                 |            |
| Oet t loug... In de bouw                      | 8, 9       |
| Klaas van Zonneveld                           |            |
| Gedichten                                     | 9          |
| Anna de Vries- Maarhuis                       |            |
| Gedichten                                     | 10         |
| Fennie F.G. Kroeze- van Til,<br>Hanne Wilzing |            |
| Gloria in ons laand                           | 11         |
| Hanne Wilzing                                 |            |
| n Veendammer Volksverhoezen                   | 12, 13     |
| Harry Roeper                                  |            |
| Gedichten, Draanksteern                       | 13         |
| Nane van der Molen                            |            |
| Nij Stoatenziel                               | 14         |
| Klaas van Zonneveld                           |            |
| De dood van Vera R.                           | 15, 16, 17 |
| Jan Huttinga                                  |            |
| Gedichten                                     | 17         |
| Willy Westerdiek                              |            |
| Joa miejong doe ook                           | 18         |
| Joyce Bodewes                                 |            |
| Veujoar, Zummer                               | 19         |
| Tiny Veldhuis                                 |            |
| Zo gaat                                       | 19         |
| Giny Hartman                                  |            |
| Geert Moatjes: Wat doen we hier en nou?       | 20         |
| Bé  |            |
| Oost of West – Wat moakt t oet/uut?           | 21         |
| Jan Blaauw                                    |            |
| Herten vouern                                 | 22         |
| Henk de Weerd                                 |            |

**OPROUP ! ! ! !** 23

## Hoera, de koegel is deur de kerke!!!



Tjonge, tjonge, wat bin ik bliede dat ik dat achter rogge heb. Man, eerlieks woar, ik sluip der nait meer van. In berre lag ik mor te draaien en te prakkezaaiern en overdag luip ik rond as n tuut dij t aai nait kwiet kon.....

Barre doagen waren dat, mag ik wel zègen. Klaainkinder harren de gugel mit mie....”Man, opa, moak joe toch nait zo drok....Das nait goud veur joen gestel...!”  
Joa, zai hadden makkelk proaten....Zai huifden dat probleem nait oplözzen.....Dat mos ik doun...

Al weken har ik der mit in de kop lopen...en ik kon moar gain licht zain aan t ìnde van de tunnel. Ik har de dagbladen, weekbladen en folders al tot in den treure deurbloa-derd..en nog zag ik t nait! Tot òflopen vrijdag.....!

Klaaindochter belde mie... nijsgierig... ”En opa, komt der al deurzicht ? Zai laagde wat...

”Deurzicht wicht ?...Ik worstel nog aalweg mit mien probleem...”

”Nou”, zee ze, “din heb ik dunkt mie de oplözzen....!”

Dou ik dat heurde, was t net of mie der n vlinte van t haart òf vuil....! “Dat zol ja mooi wezen....., vertel.....”

”Nee”, zee ze, “ik kom vanmiddag noar joe tou, din kinnen we de zaak es rustig bekijken. Ik kom mit de bus van twij uur !”

Man, zol zai eerlieks de oplözzen hebben ?... Ik har der ook al zo laank tegen aan zain....Al weken har ik mit n onzeker geuil rondlopen, om reden, dat k n tied leden mien mobieltje kwiet worden was! Ik geleuf, dat k dat al n keer vertèld heb....!

Kwart over twije ston t wicht veur deure. “Wolst thee hebben?”, vruig vraauw. Mor t wicht zee: “ Nee..ik wil eerst even mit opa de stroat in”

Ik was ain en aal oor...”Loaten wie din mor votdoalek even goan”, zee ik.

Wat zai in de kop har wait ik nait, mor volgens mie har ze wat bekokstoofd...!

”Kom”, zee ze, “hier is t”. Wie gingen n winkel in. “Goidag”, zee de verkoper. “Aha, dat is dus dij opa, dij nait wait wat veur mobieltje hai kopen mout....!”

Docht ik t nait, zai har mie mooi veur t blok zet....!

”Kom meneer”, zee e, “goa der mor es even rusteg bie zitten....Ik heb al n model kloarlègd”.

Hai legde n klaain apperoatje veur mien neuze en drukte op ain van de veule knopkes. Kerel, dat was ja n meroakels mooi ding zo te zain. “Kiek meneer”, zee verkoper, “ik heb begrepen, dat ie al eerder n mobieltje had hebben, dus dat moakt de zaak makkelker. En mocht je t nait aalmoal begriepen, din heb je aaltied joen klaaindochter nog”.

De man begon dou n verhoal op te hangen, woar ik de helfte nait van begreep...., mor klaaindochter knikte, dat zai t wel deur har... dus dat zat wel goud.

Ik pakte t apperoatje in d’haand en op slag vuilde ik mie al n stuk zekerder....!

”Dus dit toustel is geschikt veur mie ?” vruig ik de verkoper.

”Meneer”, zee hai, mit dit toustel bin je weer hailendaal bie de tied!.Moar t mooiste komt nog....Dit apperoat is n specioale aanbaiden....!”

Ik spitste de oren... n specioale aanbaiden, dat zol ja mooi mitnomen wezen....!

”Nou opa”, zee klaaindochter, “koop hom nou mor... ie kriegen veul woar veur joen geld, t is, **dat ik op t heden nait zoveul gèld heb, anders zol ik ook wel zo aine hebben willen!**”

Doar kwam de oape uut de maauwe ....

Verboasd keek ik heur aan ... “Mainst dat?” vruig ik. “Ik docht dastoe n hail modern toustel haarst....!”

”Heb ik ook”, zee zai, “mor ik kin mit mienent nait op internet....!”

”Zo zo”, zee ik... “nait op internet.... en dat kin mit mienent wel ?”

”Zeker as wat”, zee de verkoper, dij neren rook. “en nog veul meer...joen klaaindochter legt joe dat wel oet...!”

Deur dat “specioale aanbaiden” kwam mien handelsgeest weer op gang.....!

“Stel”, zee ik, “dat ik twij van dizze ap-  
perootjes bie joe koop...wat zit der din veur  
mie aan ?”.....

De verkoper begon bedenkelk te kieken,  
mor, hai pakte toch t rekenmesien en even  
loater gaf hai mie n pries.....!

Dat leek nait gek....”Nou”, zee ik, “as wie  
der baaident nog n taske bie kriegen gaat t  
deur....!”

Hai oarzelde even.... “Ik geef joe gelok”...

Dou ik mit mien koartje pind har en wie op  
weg waren noar huus, mos ik even in mie-  
zelf lagen om dij klaaine duvel van n wicht...  
Zai har mie van mien probleem ôfholpen,  
**mor ook van mien geld.....!**

Ach wat... ,wat zeur ik..., wie kinnen ja niks  
mitnemen....! **Twij tevreden mins en bin-  
nen ook hail wat weerd.....!**

j

George Petzinger



## DUNDERBUI

onder zwoar zwaark  
boegen de baiten  
dreunt dunder  
broasket bliksem  
regenpiepen rabbelen  
geuten goeselen  
binten belken  
knousten knuren

Bertus Spelde  
Oskerd, jannewoarie 2008

## MOR

zee zwicht  
wiend wiekt  
boom broest  
lij laangt  
zwaart zwint  
doek doekt  
lucht licht  
zun zigt

Bertus Spelde  
Oskerd, jannewoarie 2008

## Gloepenshaard.....



1952

Bonzo en Flip stonden soavends om n uur  
of aachte veurbie dam in Meulenstroate.  
t Was n waarme zummerdag west en dij  
waarmte gaf aanlaiden om boeten nog even  
noa te kwedeln over de rezeltoaten van heur  
neren.

“Nait te roem”, zee Flip. “Meer as 10 klanten  
heb k nait had vandoage!”

“Den jeuzel mor nait”, zee Bonzo, dij n au-  
to-reperootiebedrief haar. “Ik haar twij klan-  
ten mit n lege knibbe... n Hoop waark en  
gain hunneg!”

“Nou kiek toch ais.....!”

Der stopde n nije Opel Kapitein en wel  
kwam deroet?

Pak...(bienoam van d’achterbuurman).

“Dou mor duur”, raip Flip. “was de bus te  
min?”

“Nee”, zee Pak. “Wie mozzen n poar uur  
laanger en dou zee de boas: ‘Ik mout nog  
noar Winschoot, stap mor in, den breng ik  
die wel thoes’.


“ n Mooie kare, dij het wat kost...” zee Bon-  
zo as deskundege.

“Joa, en wat wol e haard”, zee Pak. “Wel  
100 km!”

“Dou even normoal”, grijsde Flip. “Van  
Stad noar Scheemde is ja mor datteg!”

“Oh” stutterde Pak.....”dat wait ik den ook  
nait, mor t ging gloepens haard!”

Klaas van Zonneveld  
Scheemde



## Zeekoap

Nou endelk t ies wat oet voarten en moaren rakt, zai k aalweg slagtoffers van moeke netuur. Visken dij vaastroakt binnen in t bevroren wotter. Meschain nait zo rad votkommen konnen en allerhaande vogels dij t loodje leggen mossen. Zitten mit poten vaast in t ies. Wazzen mainstekaans te mui om oet te slupen veur t noadernd gevoar. les mag wel n bult dieverdoatsie wezen veur t volk, mor n ellèn veur paardie daaier en t vlaigend spul. t Is al n hail gedou aan voldoude vouer te komen, loat stoan in dij kolde. Benoam as t boetenwotter under n dikke iesloag ligt en t laand under snij. t Vaalt n meens ja al stoer, loat stoan aal aander kreaturen. Wie kinnen n dikke jaze aandoun, n pole over oren rieten en vouten in waarme stevels steken.

Zokswat is veur heur nait weglegd. Bievouern is der bie zetten ok nait meer bie. Staarksten zellen t redden en seupelsten leggen kop dele. Zo waarkt dat ja in netuur. Dut mie denken aan Spartoanen, dij lutje potje noa geboorte mit kop in n tobbe wotter staken. Wel t levent der ofscheurde mog blieden, d'aandern verdainden heur bestoan op dizze eerdkloot ja nait, bezörgden d'olden allènt mor kripsie en verdrait. Wannern heb zokswat eder heurd? Hitler en zien misdoadege konzorten konnen der ok wat van! Dij omdeel valen kopperoal zel t wel aargenswoar opdoan hebben. Maaiden ongevraagd onvrugtboar moaken, behulpzoamen oet wege roemen. 'Untermenschen' ledderlek n kop klaainer moaken. Harregat, t is bie toeren ja onnuur wat n meens zien noasten aandoun kin!

Vlaig as doeve, zeekoap of aandersoortege vogel wied vot, as t winter wordt. Zuik n warmer plekske om te overwintern. As je t van t twijbaineg volk hebben mouten, kin joe t wel ains maal mishottjen. Veur as je t in

smiezen hebben zit je bie winterdag mit kop of poot muurvaast in t kolde ies.

Over n hoogvlonder veur mien hoes zag k n haile zoot smienten en ainden, as ok n koppel verdwoalde zeekoapen. Zie sirkelden om n kezoat, dij mit t lief in t ies zat. n Wit kopke, grieze vlerken en n swaart steerke. n Allernoarst mooi daaier. Alleneg ogen har e sloten. d'Aandern vlogen hin en weer, of ze hom helpen wollen. Muiken n bult misboar. Angeln messchain om t verspeulde levent? Aine keek mie mit zien oogkes wat loos aan, of e zeggen wol: "Wat n lieder nait?"

12 jannewoarie 2011  
Roel Sanders van t Knoal

## mien wicht

doe wilt groag  
ien n gedicht  
mien wicht

t is eigenlieks  
n mooi gezicht  
mien wicht

eerst wolk t  
nait doun  
mien wicht

moar k bin der  
toch veur zwicht  
mien wicht

zo as k die  
sums bezeg zai  
mien wicht

worden pien en ongemak  
n stuk makkelker  
mien wicht


en dien troostende stem  
geft rust en licht  
mien wicht

harm d guikema

## Allain doe

As dien leven mislukt is, niks meer gaait zoas t mout,  
 as aal dien doagen vol binnen mit zörge, denk den wel  
 doe dust t zulf! Nait aandern bepoaln dien leven,  
 dien aigen wil beslist houveul doe geven wilt  
 aan hammenie en geluk, mit dien man en kind!  
 Doe most zulf t veurbeeld geven, zörge dast ze beminst!  
 Vertraauw op heur, loat ze leven, bist n druppel in t meer,  
 mor doe heurst der bie! Denk dus mor keer op keer,  
 ik hol van heur en zai van mie. Den het t leven zin,  
 leef nait mit tegenzin mor bemin!  
 As n aander van die holdt, kinst zulf ook laifde geven,  
 hest wat woarst op baauwst, kinst ook gelukkeg leven.

Edo Staal.



## Pubertied

Wandeln in t gruun, blonde hoarn, zaacht gefluuster,  
 dat is wat ik doun wil, kuzzen, snoetjeknuvveln in t duuster.  
 Leven van t laifdesspel, zunder denken, zunder zörge...  
 Zeg mor niks, ik wait t wel, noa dizze nacht komt weer mörgen  
 dij mie weerom brengt noar de nije dag.  
 Ik heb van de laifde pruifd, ik heb doan wat nait mag...  
 Ik zol t zo weer overdoun, ik heb gain spiet,  
 de gedachte doaraan wor ik nooit weer kwiet.

Edo staal

## n Flezze Cognac



Oaflopen week heb ik mie toch n blunder  
 begoon; de tonen begunnen mie nog krom  
 te stoan nou ik der weer over begun. Jaantje  
 en ik waren nuigd bie kennissen dij wie joa-  
 ren leden, deur wat verhoezens van baaide  
 kaanten, wat oet t oog verloren haren.  
 Deur n touval waren wie weer mit mekoar in

kontakt kommen en dou was n ofspraak  
 gaauw regeld.

Oaflopen week gongen wie op verziende.

Jaantje haar wat fotobouken bie mekoar  
 verzoemeld, want in de joaren dat wie me-  
 koar nait zain en sproken hadden, was der  
 veul gebeurd. Vlak veurd dat wie oafraizen  
 zollen, was ik de fotobouken nog even aan t  
 deurbloadern en dou ontdekte ik dat krek op  
 dizze dag oonze kennissen heur traauwdag  
 haren. Doarom waren wie netuurlek nuigd,  
 dit was van heur kaant n test om te kieken  
 houwer wie heur vergeten waren. Wat n gel-  
 lok dat ik dit nog bietieds ontdekte, mor

touglieks deed zok n probleem veur. Op dizze dag konnen wie nait aan schier boske bloumen kommen, omreden ale winkels slo-ten waren.

“Ik heb wel n oplözzen”, zee Jaantje, “doe hest lest n hail dure flezze cognac kregen en dij staat nog in kedo verpakken in veur-roadkaast”.

t Zel joe verwonderen dat te heuren... Ik lus geern n zeupke, mor van cognac doar kin k wel van schudden en dat zet ik din ook nait in t zicht. Hou gaat dat din.....je vergeten dat je zokswat hebben. Van oonze kennizzen wozzen wie nog, dij binnen grode laifhebbers van cognac, dus wie kwamen nait mit lege handen op dizze hail biezonder dag.

t Weertzain was hartelk en biezonder en wat waren ze blied verrast dat wie heur traauwdag nait vergeten waren. En dou wuir de flezze cognac oet de kedo verpakken hoald. 't Was echt n hail dure soort en dat vuil biezonder in de smoak. Mit dat de flezze oet de verpakken kwam, vuil der ook n koartje oet en dou oonze kennis dij las, keek e slim zoer en luit mie de tekst lezen. Op t koartje ston:

“Bedankt voor de jarenlange inzet, medewerking en samenwerking” en deronder stonnen wat noamen.

Ik wuir waarm en kold touglieks, en ik wos nait hou of ik dit rechtproaten mos. Eerlieks zegd.....der vuil niks recht te proaten. n Kedootje veur mie persoonlek haar k votgeven; ik was deur de mand valen.

Lös van dizze grode blunder, was elkenain toch bliede dat wie mekoar noa joaren weer vonnen haren en wie hebben t nog slim gezellig had mitmekoar.

Dou wie weer thoes waren, bin ik votdoedelk in veuroadkaast doken en bin ook ale aandere kasten bie laangs west en k heb overaal ale verpakkens van oafhoald.

Joa, krieggen is ain ding en geven aarmt nait, mor.....och vul zulf mor wieder in.

**Trijnko Pelgrim.**


## Keukengehaim

joe nemen veur 60+ERS  
drij kilo ie-meel  
twij kilo oafluustermeel  
14 stuks gilmlaggers  
1,5 liter bovenwotter  
en melk noar behuifte  
Zolt uut Kamp



dit mout goud twitterd worden  
en opsloagen ien smoelbouk  
opdainen op haarde schieven

**harm d guikema**



## Zwemles


t Is mie wel wat beste mensen,  
k mout van moeke op zwemles gaan.  
t Is *vrahteg eerlieks* woar!  
k Kin mie wel wat beders wensen,  
as mien kop en hoar ... vol chloor!

Wat n *kulloazie* in dat woater,  
dat *gesputter* en meer zokswat.  
Aal dij *waggels* en *gekloater*  
t mukt n mens ja *zoempenat*.

Woar is dat gedou veur neudeg?  
Zwemmen kin k ja al zo laang.  
Joa... *allenneg* mor op t dreuge...  
*Den* in t woater, bin k ja *gloepens* baang.

**Roel Sanders**

## Oet t Loug.... In de bouw



Berend Koekak, Fobbemoaze. Jans Nakke, Gele Durk, Moos Nijland, Karel Pinda, Jan Popije, Sam Bukken, Haarm Kniene, Tjamp Nijland, Jurn Nakke, Gerrit Piggo, Jan Bee.....Aal bienoamen, dij bie mie opkomen, as ik trogge denk aan joaren zesteg in Nij Scheemde. Ook wel Scheemterhammer nuimd.

Moos is veur mie ain van de kleurrieksten, van wel ik mien herinnerns geern mit joe dailen wil.

As Moos bie mien schoonvoar kwam, den nuimde hai hom in t begun bie de achternoam. Noa n glaske bier of n kloare ging e over op zien veurnoam en noa t twaide borreltje was t den Popije veur en Popije noa...! Ik haar doar in t begun n roare kiek op, mor t was gain schelden...Hai vuilde zok den thoes en gaf dat mit t benuimen van de bienoam aan. t Was ook aaid n sigoare, dij hai van t rooktoaveltje snapte. Nou is roken betuun, mor dou ston der in elke hoesholden zo'n ding in koamer mit sigaretten en sigoarn, n asbakje en voak ook nog n puut pieptebak. Moos was baauwvaker, net as mien zwoager en baaident waarkten bie dezelfde boas.Der was n bult waark in de pervinsie. Maist nijbaauw in dij tied. In t begun mozzen zai op fietse, loater mit heur baaident op n plof en nou was t al mit n buske. Zai haren n put in de buurte van Zuudloaren, n groot nij hoes veur n meneer, dij t nogal naauw nam en nait echt gul was. Al n moal of wat wuir derover proat en zegd, dat e gain kradde bier brocht. Moos von, dat t nou tied wuir om dat mor ais te regeln! "Dat lukt die nait bie dizze kerel" docht mien zwoager.

Moos docht doar anders over en haar aanderdoags al n goud plan.....

'Moi!' Moos stapde in t buske en zette n grote platdrokte deuze achter de baanke.

"Nait tegenaan steuten" was zien woarschouwen. 't Is nogal breekbaar!'

"Wat zit der den in?" wollen jonges waiten. 'Dat zai je dommeet wel' dee e gehaaimzinnig en smeigelde wat. Aankommen bie t baauwwaark, laip e votdoalek deur noar t heerdstee.Oet t keton kwam n groot stok helder glas, dij hai in de schösstain metselde. Zien moaten wollen waiten, waarom dat was, mor Moos zee niks.

'Bek dicht, as dij kerel straks komt!' woarschouwde hai.

Om n uur of vaaier kwam meneer aanreden in zien bolide. Even kieken, hou oft der bie ston.

'Zo, heb je de open haard al klaar?'maarkte hai op.

"Joa", antwoordde Moos kört.

'Enne, doet ie het?'

"Dat zellen wie even oetperbaaiern' zee Moos en laip mit n poar olle kraanten noar de heerdstee. Vlam derin en in de open heerd onder schösstain. Gain trek.....!! Meneer kwoad en sputterde, dat hai docht mit echte baauwvakkers te doun te hebben! Moos op rogge onder t schösstain: "Ik zai t ducht mie al. Dat hebben wie al voaker had.

As meneer ons n kratje bier mit n liter jenever brengt, komt t wel goud'.

De man broesde wat over assosioal gedrag en stoof mit n dikke rooie kop vot.

"Zugst nou", zee zien moat. "k Zee die ja, dat e dat nait dut!".

'Wie zellen t zain', was t antwoord. 'Zellen wie deuren derin hangen?'

Mit zien baaident haren zai der vijf deuren in, dou zai n auto heurden.

"Nou zelst hebben", zee mien zwoager.

"Doar komt de boas!"

Dij was t nait. Mit grode stappen en nog aal rood om kop kwam meneer aanbentern en zette n kradde bier onder t venster.

'Zugst dat?' glom Moos. 'Ik krieg geliek!' n Poar doagen loater kwam meneer weer aanrieden.

"Hest dij glasploate deroet?" vruig mien zwoager benaauwd.

"Aal op stee, loat hom mor kommen!"

"En.....? Denk je dat ie het nou gaat doen?"

"Ducht mie wel, joa, wie haren t mankement nogal gaauw vonden" zee Moos. Hai stapte noar de heerdstee en stak vannijs de brand in n kraande. Dij vloog mit n bloudgang deur de schösstain en gaf meneer aanlaaiden om



zien gezichte weer wat in de plooi te trekken.  
'Is meneer nou tevreden?' vruig Moos laco-  
niek.

"Zo hoort het.....!!!!"

'Joa, mor t ken nait aal mitlopen in t leven hèn.  
n Leven zunder hobbels is ook mor saai, vin-  
nen ie nait?'

Op trograaize noar hoes was der van muieg-  
haid niks te maarken....

'Mit Moos mog ik aaltied geern waarken' ver-  
telt mien zwoager voak op n verjoardagsver-  
ziede. En as je doar den noa viefteg jaar nog  
om lagen kennen, is dat hail begriepelk.

Klaas van Zonneveld,  
Scheemde.

## Oet dizze tied



k kuier op kerkhof mit zoveul stainèn  
minskèn dij doar oet tied binnen, wis elks is geliek  
sinten of nait, t zet hier gain zoden aan diek  
dizze lu zunner proat, zunner aigen mainen

mien miemeroaties, mien denk wat k doar mit kin?  
kiek noar hemel omreden k ainmaal hierzoot bin

Anna de Vries-Maarhuis

## Slikje preek

bie begun van preek  
keek k  
mor noar ain ding  
rondgoan mit "king"

sums ruzzeln en zo  
doar komt de "pecto"  
n haile oaventuur  
in mond wel tot twij uur

din komt preek  
oetschaiter van week  
ain ding benoam  
flotseg slikje "foam"



bie end van preek  
dizze nije week  
geft aal weer moud  
dit "slikje" is aalmansgoud.

Anna de Vries-Maarhuis



## Ons tied van welvoart

lu raaizen noar moan  
mor..zain noabers nait stoa

lu doun aal post per droad  
wordt nait meer mit nander proat

mor minskèn blieven op bain  
as lu mor van dij rötzoai zain

haand op scholler din is t goud  
dat gef t n minsk weer moud

woord laifde is zo klaain  
in ogen is t ja te zain

klaaine muite kin ons leven  
zoveul schiers riekkel geven

laiverd, tudebekje, k hol van die  
klinkt as meziek, teminzent in oren van mie.

Anna de Vries-Maarhuis



Tammo komt bie bakker Bakgroag.

Tammo: "Mag ik n stoet?"

Bakker: "Joa, dat mag wel, mor wat veur  
ain? Wit of broen?"

Tammo: "Joa!"

Bakker: "Wat joa?"

Tammo: "Joa, bakker!"

Eppo is dakgeude aan t vaarven, hai komt iederbod omdele van d' ledder òf en stipt bozzel in vaarfpot dij op grond staait, gaat weer bie ledder op, vaarft, komt weer omdele.

Hinderk komt op fietse langes en zugt wat zuk ofspeult.

"Woarom nemst dij vaarfpot nait mit noar boven?" vragt e

"Dat kin ja nait", zegt Eppo, "t is grondvaarve!"



Hinderk en Oaltje rieden mit auto van Stad weerom noar Troapel.

Zie binnen in Stad aan t winkeln west, noar Hinderk zien zin veuls te laank, doar hebben ze kribberij over kregen.

Haaile weg wordt der niks zegt, gain ain van baaiden wil inschikken.

As ze in de buurt van Muzzelknoal bie n waailaand mit ezels langskommen kin Oaltje zuk nait langer stilhouden: "Familie van die?", vragt ze n tikkel vranterg.

"Joa," zegt Hinderk, "aantraauwd."



## 'Ras'

Doar zaten zai  
broen en blaank  
onder wotterparreplu  
waren aibels blied  
k docht nog, God dank  
soam onder dij plu...

Cola dronken zai  
stoef noast nkander  
op grode swimbadterras  
en aten der bie  
hail gemoudelk  
soam, n patatje 'ras' !

Fennie F.G. Croeze-van Til

## Nijjaar



Nijjaarsdag. k Wol even beste wensen deurbellen noar n kammeroad .

k Kreeg vraauw aan liene en wie pruiten zo n inne weg. k Bekeek t as n aanloopje veur t gesprek mit hom. Mor t wui mie dudelk dat zai doar anders over dochde: hai is der nich, even noar bureen nijjaarzeggen.

Kiek aingst is veur mie de lol der den of.

Mor glik ophangen is ook ja wat maal en zo bleevve nog even wat deurteuten over van alles en nog wat. Mor in gedachten was ik al aarns anders en mit tillefoon in aine haand gong ik mit aander haand nije planke op slopkoamer schuren.

En douve t over veurnemens in t nije jaar kregen –heb ik nooit- luip ik noar wc um even te pizzen. Dat gijt er ja aal wol glik um deur. ‘

Wat heur ik’ zee stem aan de aandere kaande van liene. ‘Wotter’ zee ik. ‘Wotter?’ ‘Joa’ zee ik ‘kroantje lekt’.

‘Maal waark’.

‘Joa mor ik heb hom dichte drijt’ zee ik dou ik onderwiel snel weer dichtknupte.

Moar goud davve nog gain beeldtillefoon hebben.

Hanne Wilzing (Jannewoarie 2011)

## Umkeren

Op dizze loate nommerdag  
rie ik leste hōgte op  
joag ik op wat haart mie vrag

Mit landschop word ik gries  
-zol der veurbie dizze bochte nog meer weden?-  
zuik ik smok in t parredies

Deur holtwalen kin ik t net nich zain  
ol ekkelbomen benemen mie t zicht  
oet brummelstroeke klinkt filaaïn:  
dammeet word t leeg en slicht

t Wordt oavond en t wordt nacht  
steerns wiezen mie t rechte pad  
drang noar veuren hef mie in zien macht  
um hōm ligt meugelk nije stad

Den heur ik sikkom vergeten stem:  
wat zōchst, keer um, keer um

Hanne Wilzing (juli 2010)

## Gloria in ons laand

t Rokt noa mizze  
 n plaze ropt en reert  
 jirre vergraimt stroade  
 Wie lustern en zeggen:  
 t kon n pondje minder, mor zit wat in  
 en n flottje stront mokt t laand ja gaail  
 Krödde komt op tou grond oet  
 gezichten verswinden in lieke lienen  
 votaaid in boarden in jurken,  
 heufddouken, keppels, kruzen,  
 n rollator woar niks van komt  
 en Ik-bin-der is oet tied  
 noamen binnen kwiet en d'ain wordt d'aander n ding

Mor dwaars deur roet waast gaarste  
 in de muide löcht weeromkeren op  
 Maarten kikt bie stoplicht Ischa aan: shabbath shalom  
 Ingrid stoekt mit rolstoule Fatima helpt heur veuroet  
 Bie Hans en Ton binnen roeten ingooid  
 mor haile stroade stijjt vergrèld as ain man op  
 En d illegoal oet portiek hait Engel  
 Recht en vree valen nkander um haals  
 t Is aal ja nich zo stoer

Hanne Wilzing

(Op psalm 85; 29 augustus 2010)



Bie schriefsel 'Gloria in ons laand'

Volgens in november veureg joar oet tied kommen Willem Barnard ('Stille Omgang') wui in eerste tied van christelijke kerke van loate haarst tot vrouge winter elke weke psalm 85 zongen. Adventstied wui dou wat roemer nomen. Tegenworreg is Advent n körte aanloop noar Kerst, mor volgens Barnard stijjt Advent aingst veur t Keunenwiek dat er aankomt. Veur n umkeer noar t goie. Mit t oetkommen van nij Grunneger laidboek in november leek mie t doarum schier um n schriefsel bie psalm 85 te moaken. t Is al n zetje leden dat psalm 85 schreven is, mor kinnen der in dizze tied hail goud mit veur n dag kommen. t Gef ducht mie goie road over hou ve in onze wereld t goie zuiken mouten. Doar kin ve goud n beetje umkeer bie broeken. Nich mitdoun mit roupen en reren. Nkander in ogen kieken, ook as de ander Fatima hait of homo is. Mensen binnen ja mensen neudeg. En den kin t mor zo weden davve –net as Oabram- in d aander d Aander tegen kommen. Advent. Gloria. Hol de kop t er veur.

Hanne Wilzing

## n Veendammer volksverhoezen



t Was in t joar 1975... t Eerste weekend in september. Mien pa en ik wachten mit spannen op voetbaloetsloagen. As grode aanhangers van SC Veendam wazzen wie benijd noar d'oetslag van bekerwedstried tusen Fortuna Sittard en de speulers van de Lange Leegte. Der was dou nog gain mobieltje, gain internet en teletekst op tillevisie. Nee, je luusterde noar 'Langs de Lijn' op radio mit voetbaloetsloagen, lezen deur Frits van Turenhout, wereldberoemd in Nederland deur zien mooie oetspraak van 'nul-nul'. En doar kommen d'oetsloagen.....en din.... Fortuna Sittard-Veendam 3 (oh, nee he)-5! Hoera, wie hebben wonnen. Nou moar hopen op n mooie tegenstander en n toeswedstried. Mor t löt besliste aans: t wuir Feyenoord-Veendam in Rötterdam. Dunderdags dernoar verscheen in weekkraant De Veendammer n oprop van de fanclub dat zai n raaze organiseren wollen op 12 oktober noar de Kuip. En nait mit bus, nee mit traain. Dat was nog ais n goud plan. Traainstation was der nog, t emplacement ook nog, din der was nog oareg wat goedernvervoer over dat spoor. Nou allain nog de vrag of de NS n traain beschikbaar geven wollen op dij dag. En was der wel genog belangstellen veur.... Mien pa en ik wollen ons geliek opgeven. Den gong der weer n traain over t traject Veendam-Stad, zoas joaren leden -tot 1953- deur de vrougere N.O.L.S., de Noordoosterlocaalspoorwegmij. Mien pa haar dou in dij tied n volkstoentje stoefbie station Meeden/Muntendam. As kind gong k in zummer voak mit en k wos dat der rond zeuven uur n goedertraain richten Zuudbrouk gong. Ast den sikkom zo wied was, runde ik deur t hoge gras diek op en loerde of traain der aal aan kwam. Voak kreeg k din n poar sinten mit om dij op rails te leggen. As traain veurbie was mit zien 30, 40 woagens runde ik weer noar t spoor om mien platslepen sinten en stuyvers te pakken

en zo was mien laifde veur traainen geboren. Ik wol geern traainmachinist worren. Wie haren dou toes gain auto, moar n 'plof'. Mor dat leste is nou n Spartamatic. Mor k bin aan dagdreumen roakt. Nou weer noar t joar 1975. In 'De Veendammer' kwam elke week n stukje over raais noar Rötterdam. De fanclub was aal drok mit de veurberaidens aan gang en wie wazzen benijd of der genog supporters wazzen om n traain te regeln. Genog????? t Luip störm! Honderden minsen wazzen enthousiast en nait allain oet Veendam, nee oet de haile pervinsie. En dou...was der n traain regeld deur de NS. Mor ja, der haren zok zoveul minsen opgeven, dij konnen nait in ain traain, nee der mozzen der twij kommen. Laifst 1500(!) minsen haren zok opgeven en dij wazzen der op 12 oktober aalmoal. De landelke pers haar der ook van heurd en in de Telegraaf ston n artikel over "De Veendammer Volksverhuizing". Mien pa en ik zatten in d'eerste en laangste traain, dij haar blaauwe rietugen en wuir trokken deur dieselokomotieven en wuir "Fanclubexpress" nuimd. Twijde traain was de in dij tied bekende gele stoptraain, ook in dieseloetvoern, den der was in dij streek nog gain elektrieke bovenlaiden. Wie gongen links in traain zitten en kwammen zo langs de streek woar mien pa eerder zien volkstoentje haar. Ook gongen der 16 spoorwegrechercheurs mit. Wat n geweldege dag was t. n Traainraais, in de Kuip n voetbalwedstried mitmoaken en feestvieren mit zo'n 1500 supporters. De 'Langeleegtejongs' haren zok goud weerd, mor deur n groot slotoffensief van Feyenoord wuir d'oetslag 5-0. Mor.....t verdraait van t verlais duurde nait laank en der wuir weer zongen, laagd, eten en dronken in traain. Wie haren zulm aal wat eten en drinken mit nomen, mor d'obers haren in onze traain 500 stoetjes, 500 bierworstjes, 1500 blikjes frisdraank, 1200 bekers kovie en 3000 blikjes bier verkocht. Mor.....d'Oostgrunnegers hebben zok hail netjes gedroagen, kom der nou mor ais om. d'Ainege wanklank dij der was, was dat der aine bie Hoogezand aan noodrem trok, mor dat dee hai allain mor omdat machinist doar vergat te stoppen. En doarnoar was t weer stil bie station Veendam. Totdat joaren loater de S.T.A.R. kwam mit n museumspoorlienen richten Stadskenoal. Nou is der n plan

om n echte traainverbinnen mit personenvervoer te moaken tussen Veendam en Stad Zuudbrouk. En dat zel al in maai wesen. Hopenk lukt dat aalmoal.

Joa....en traainmachinist bin k nait worren. Dou k 18 was, dee ik mien 'volksverhoezen' van Veendam noar Hilversum/Amsterdam en ook nou raais ik aaltied mit traain. k Bin in de raaiswereld trechte kommen en verkoop nou deur t regeln van zoakenraaizen – hou ken t ook aans – traainkoartjes aan onze klanten. Bieveurbeeld koartjes van de Thalys, Eurostar, ICE en wel wait, meschain ook wel binnenkört koartjes van Arriva noar Veendam.

Ik wins den ook de gemainte Veendam, persinsie en Arriva veul sukses hiermit en dat der din veul Grunnegers en 'Nait-Grunnegers' gebruik moaken kennen van dizze spoorlien en zo genieten kennen van ons mooie Grunneger laand.

Harry Roeper



## Noazummern

Waarm en stovveg ligt t òfwaarkte laand der heer  
groanoogst is ja aan kaant al weer  
Koren is vot, vrougriepen binnen der oet  
Zummervaalgd laand tegen roet

Bloots n stuk doar blaikte stoppels nog op stoan,  
ligt soezeg oetrustend noast loan  
Aandern worden kloar moakt veur t ienzaaien weer  
Trekkers goan aal broezend te keer

Nuunjend over wat was en wat kommen zel,  
fluustert wiend deur raait ien sloten  
Boer en vraauw op baankje ien t hof heuren t wel

Luusternd noar t verhoal doddern zai doar ien zun  
en dreumen van ankommend oogst  
Zai waiten t ja wis : Elk ènd dudt n nij begun!

Nane van der Molen  
22-02-2011

## NACHT



Langzaam aan dooft overaal t licht  
is zun ien sängen kleuren swicht  
ligt vij as logge vörms ien t laand  
lui herkaauwend mit waark aan kaant

Zunlicht is doofd, dij laamp is oet  
twijduuster vörmt scharen laankoet  
hou rij zun ook mor mog schienen  
laand zèl ien donkern verdwienen

Waarmte gaat vot, t wordt al wat kil  
oel doekt te boom oet en vlugt stil  
vreten zuikend mit zainde ogen

Dij van nacht is, kin naauw de dag  
dij van dag is, kin nait de nacht  
mit aigen ritme van levenskracht

Nane van der Molen  
11-02-11



## DRAANKSTEERN

Dou Gezienus n jongkerel was en nog nait zo laang  
traauwd, haar e, dou e n moal wat te veul draank had  
haar, noam kregen dat e der nait ien spijde. Elkenain  
wis zekerwoar dat Gezienus perool zien klokjes kreeg,  
ook al was e nooit vernijs doen west.

n Moal, joaren noatied, viel ain van noabers oet t  
heugoul en brook zien bain. t Laip apmoal redelk  
goud òf en t haar n bult minder kind, mor noaber mos  
vanzulf aal mit zaikenwoagen noar Groot Zaikenhoes  
ien Stad tou. Gezienus het mitholpen dat man ien  
zaikenwoagen tild wer en dou dij op pad was noar t  
zaikenhoes, werren Gezienus en aander noabers dij  
mitholpen haren ien binhoes nuigd om eefkes wat te  
bekommen van alteroatsie. Noaberske kreeg jannever  
vles, gloaskes en n spoulkom te kast oet en schonk  
dij vol. Gezienus kreeg spoulkom vol mit jannever  
veur zet.

Dou hai vebaldereerd vroug woarom hai n spoulkom  
vol jannever veur zet kreeg, zee noaberske:  
“ le luzzen t ja zo aibels geern!”

NvdM  
25-11-10

## Nij Stoatenziel.....



n Joar of wat leden vruig Lineke Dekker oet Blijham mie of k n noam bedenken wol veur heur nije boot op t Oldambtmeer... Zai wazzen d'eersten, dij wel wat zagen in rondvoarten op t meer.

Van t ain kwam t aander....

Mien opbedochte noam: 'Windschere' wuir oetkozen en as dank kregen mien vraauw en ik n schier dagtochtje aanboden. Vanoaf Wedderveer mit boot over de A en t Boelo Tiedenskenoal noar Rhederbrug. Onderweegs vertelde Alex Visschering over de noatuur. Iesvogeltjes, rötten vangen en zulks meer. Hai haar zien gitaar ook mit nomen en laidjes as 'Lenin en Stalin', 'boeren bedankt' schalden over t wotter. 'Hollanders' dij ook mit wazzen, keken heur ogen oet! *'Wat prachtig! Het lijkt wel de Mississippi!'* kraaiden ze in t Boelo Tiedenskenoal. Jammer, dat ze nait alles mitkregen van Alex zien verhoalen...

Zoas t verhoal over Nij Stoatenziel. Eerste stee in Grunnen, woaras de zonne opkomt!! Zien enthousiasme dee ons besloeten, om dat ais te beleven. Oaflopen zummer zee ik op n nommedag tegen mien buurman: 'Zellen wie mörnvroug noar Nij Stoatenziel?' (mien vraauw was t te vroug, mor hai hapte gelieks tou). Om kwart over vieve vot. t Was oareg diezeg en t leek der nait op, dat zonne veur n dag kommen zol.....

Dat was ook zo! Haile tied gain zonne zain! Jammer, mor t dee niks oaf aan ons plezaai-er. Deur de raiten noar t vogelkiekhoeske. Wat n pracht, wat n rust en stilte. 'Mooi he!' mompelde buurman. 'Joa, asof der gain mensk op de wereld is' was t antwoord. Mit ons baaident was t volop genieten. 'Kiek doar ais' raip ik enthousiast. Aan kaande van t wotter laip mouderziel allain n mooie ree. 'En wie mor denken, dat we hier mit ons

baaident binnen!'

'Joa, zol hai der net zo over denken? k Wol zien gedachten wel ais heuren!'

Tegen tien uur opperde ik, dat k ook nog wel ais bie de punt van Raide kieken wol. k Was der nog nooit west! Buurman von dat n gemis en vertelde honderdoet over aal dij vrachtwoagens puun, dij hai doar stört haar en over de floater van Joop den Uil mit zien boeten- en binnendiek! Thoeskommen vertelde ik moeke, wat n prachtige dag wie had haarn en nog dezulfde zummer bennen wie n moal of wat op fietse van Stoatenziel noar Termunten en noar Ditzum west.....

Achterof vroag ik mie of, woaras ik mien verstand joaren leden haar. Wie stoven mit caravan deur hail Europa! Stress en keboal wazzen voak ons dail. En dat, terwiel t dichtbie zo mooi en sti is....

'Der gaat niks boven Grunnen' heur ik Henk Vonhof op Noord zeggen. En zo is t mor net!

## Klaas van Zonneveld, Scheemde



## De dood van Vera Reker

Spannend vervolgverhaal – dail 7  
schreven deur [Jan Huttinga](#)

*Dat is nait veul. Mor doar mouten we dommit ook mor eefkes waark van moaken. Denkst doe dat dij hampel van n Flipje n kopie moaken kin van dat schiefke. Of ist lozer, dat e dat ding noar de TD brengt. Dat ze dat doar doun?’*

*Ester docht noa. Ze pakte heur mobiel aan en gnivvelde wat.*

*‘Dat leste is beter dunkt mie. Loat e dat mor doun. Ik zel votdoalek bellen.’*

*‘n Knal is vanzulfs te makkelk’, zee Dubbeldam. ‘Dat ken niks wezen. Nou ja, dat heuren we nog wel.’*

Hai trok weer op en ze reden noar de Olderman State, Bie ingang ston Dina Stallinga t wachten. Ze druing n strak mantelpakje mit donkere kousen. Ze haar zuk licht opmoakt. Ze haar pumps aan mit aibels hoge hakken. Dat vond Dubbeldam nou weer minder. Ze stak sikkom n kop boven hom oet. En dat kon e nait hebben.



*‘Wie kommen joe weer ploagen’, begon e. ‘Ik mout over n haalf uur op n receptie wezen van t overleg. Ik vervang Jansonius.’ ‘Jansonius?’*

*‘Directeur, dij in t boetenlaand is.’*

*‘Wat von e der van dat ain van zien personeelsleden dood is?’, vruig Ester Edens.*

*‘Hai is zuk doodschrokken en het kans zain om zien vlucht te verzetten noar mörgen.’*

*‘Wie binnen op zuik noar n mini-disc speulder. Wordt zo’n ding bruukt bie de balie?’*

*Stallinga keek hom onneuzel aan. Ze haar dudelk gain benul woar dit over ging.*

*‘Ik heb zo’n ding nog nooit zain. Woar zol je zo’n ding veur neudeg hebben? Nait bie de balie.’*

*‘Wel waarken der bie de balie? Dat was Vera Reker, Katrien Datema, Bo Laangis en volgens ons Lena Kothof.’*

*‘Gaint van dat plougje het zo’n speulder. Veur t waark is e nait neudeg. Wel van joen personeel zol zo’n ding neudeg hebben?’*

*Dina Stallinga schudde wat mit kop. Ze keek op heur horloge. Ze kwamen bie de balie aan. Katrien Datema kreeg n kleur dou ze Dubbeldam in de goaten kreeg. Hai grijsde heur aan. Mit drij man hingen ze over de balie en bekeken t buroblad.*

*‘Hebben wie hier n, hou hait zo’n ding?’*

*‘Mini-disc speler.’*

*Katrien keek noar ale spulletjes op heur blad.*

*‘Nee.’*

*‘Ook nooit ain tegenkommen?’*

*‘Nee.’*

*‘Ain van de personeelsleden den?’*

*‘Nait dat ik wait.’*

*‘De bewoners?’*

*De baaide mitwaarkers van de Olderman State keken mekoar aan. t Was eefkes stil. Boeten klonk t ieselke gegilp van de paauwen.*

*‘Dat zol ik nait waiten, we kennen natuurlek nait waiten wat de bewoners hier aalmoal in hoese hebben. Mor ik ken mie der niks bie veurstellen. Hou zugt zo’n ding der den oet?’*

*Ester beschreef kört en bondeg.*

*Ze bleven mit kop schudden. Mor konst wel vernemen dat de vraauwlu echt gain road wizen mit dit probleem.*

*Ester drukte deur. Dubbeldam draaide zuk om en keek oet t roam.*

*‘Woarom lag der den zo’n opnoameschiefje veur zo’n ding op t buroblad?’*

*Weer keken de vraauwlu mekoar goud onneuzel aan. Ester wuir wat grammieteg.*

*‘Zit der ook internet op dat ding?’*

*Katrien Datema nikkopte.*

*‘Mag ik even?’*

*Snel luip ze om de balie tou en tikte wat in. Op t schaarm verscheen n ploetje van n minidisc mit schiefkes.*

*‘Messchain helpt dit. Heb je bewoners wel ais mit zo’n ding lopen zain?’*

*Nog n keer tikte ze wat in. Nou kwam der n groder model minidisc-speuler op t schaarm.*

*‘Staait zo’n ding bie ain van de bewoners in de koamer? t Schient dat dit soort apperoaten wonderlek hoge kwaliteit aan meziek*

levern.'

Baaide doames zwegen. Dubbeldam luipt weer noar de balie tou mit haanden in buuts. 'Den kommen wie mörgen weer en den wol ik van joe groag noamen hebben van bewoners, dij zo'n of zo'n apparaat hebben.' Ester pakte twij vellen pepier oet de printer. Ze haar de baaide soorten speulers oet-draaid.

'Doodlopende weg. Moi.'

Flipje haar zien waark dubbel en dwars goud doan. Dou ze weer op buro kwamen, lag der n kopie van t schiefje te wachten. Hai haar speuler op n poar boxjes aansloten en groots as oap mit zeuven steerten zat e te wachten. Mor ze luiten hom nog even ziten. Eerst wollen ze kovvie.

'Nou mien jong,' zee Dubbeldam.

'Verboas mie mor ais.'

Philip Bakker zag zien kaans.

'Ik heb alles drij keer ofluusterd. En dit wat je nou goan heuren is t ainegste wat aans is as t tikken van n klok.'

Mit zien dikke vinger drukte hai op n onneuzel klain knopje. Ze luusterden.

Eerst heurdest wat geknitter en geroas. En dou wuir der wat zegd. n Kind of n wichtje of n vraauwspersoon.

'Nog n keer', zee Ester.

'Haarder', zee Dubbeldam

'Weer wat zachter, minder bas.'

Zo duurde t tien minuten. Aalgedureg luusterden ze weer vannijsj noar dat aine stukje.

Ester pakte n stuk pepier. Dubbeldam wol wel in de boxen kroepen.

'Dou mor oet jong,' zee Dubbeldam op t lest.

'*Toe nou Bertil, blijf nog even, blablabla, sportief opvatten. Blablabla over praten. Zo erg is het toch niet.*'

Ester las t op van t bloodje.

'En den heurst n knal. Nou ja, knal....' Dubbeldam keek noar zien jongste pazzipant.

'Ik denk dat der mit voest op toavel haauwen wordt ofdat aine mit n toestege kop n deur dichtknalt.'

Flipje nikkopte en keek glunder. Dit was zien dag.

'Mor haarst ook nog wat over kraaien van n hoan of zowat?'

'Joa, den mout ik even zuiken', zee Flipje.

Hai keek in zien opschrieboukje en drukte op n aander knopje.

'Hier ongeveer mout dat wezen. Luuster

den!'

Dat deden ze. Heurdest t tikken van n klok en wat geroes. Den inaine was der n aander geluud te heuren. Op de achtergrond van t tikken. t Was wel kloar as n klontje dat t geschraiw van boeten kwam.

'Ach jong, haalsknoak, waar hest vrouger wel nait zeten, bie biologieles. Elk ken toch heuren dat dat gain hoan is.'

Ester Edens keek Dubbeldam aan. Flipje keek n beetje sneu noar zien grode veurbeeld.

'Dat', zee Dubbeldam. 'Dat binnen dij widde krenge van de Olderman State, mag ik stikken.'

'Nee, nait doun', zee Ester.

'Wie hebben nog n bult te doun. Flipje wegwezen mit dien geluudsinstallatie. Worst bedankt. Magst nog n keer mitdoun. Hort.'

Philip Bakker pakte zien boudeltje biemeakoar en luipt terug noar zien aigen stee.

Zo ging dat nou veul voaker. As t der op aan kwam en t wuir spannend, den mocht hai weer achterlichtjes controleren.

Ester Edens keek op heur sedel en dou keek ze noar vragend noar Dubbeldam.

'Nou zeg t mor', zee e.

'Wel is Bertil?'

En wel het doar zo'n roezie mit hom aargens over?'

En waar is dij minidisc speuler bleven?'

En van wel was dij?'

En in welke koamer is dat opgenomen?'

En waarom?'

En wat het dat te moaken mit dooie Vera Reker?'

Dubbeldam trok wat mit scholders en wist t ook nait.

Dou ging de tillefoon. Ester nam aan. Ze luusterde ingespannen en boven heur neus kwam weer zo'n glief. Dubbeldam keek noar heur. Hai wol heur. Mor gain schien van kaans, omreden dat zai hom nait wol.

'Kootje het wat vonden.'

'Wel is Kootje?'

'Toenman van Olderman State, beschaarmeling van Dina Stallinga.'

'Hm.. en nou mouten wie der maank?'

Ester Edens trok scholders op en pakte heur tas.

'Tja wat ken mie dat schelen, Katinka, Kato, Katrien van Datema klonk nogal oet lood.'


'Wie bleiven in de weer vlaigen. Ik stel veur dat we doar n koamer vragen mit twijper-



soons berre. Den kennen we doar beter blieden.'

'n Twijpersoonberre haar ik docht. Den most der ook nog aine bie hebben. Ik sloap toes. Ik heb der nog gain schiere verpleegster lopen zain, mien jong. Mor messchain wil Katinka, Kato Huppeldepup wel.'  
Ze luip vot. Dubbeldam besloot toch mit heur mit te goan.

*(wordt vervolgd)*



## noar zaikenhoes

wekker lopt òf  
is t al tied?  
t is ja nog zo vroug  
onnerwegens is t ok al zo drok  
waarkvolk  
heur k nait meer bie  
das verleden tied  
zaikenhoes wacht

Willy Westerdiek

## zaikenhoes

wachtkoamer  
zittend kiekend  
op n baankje  
wel gait noar hoes  
wel blift  
zol t hoast tied weden  
of bin k te vroug  
ogen zuiken  
klok vannijs  
t is hoast zo wied  
bin groag op tied

Willy Westerdiek, Nijlaand

## Wachtkoamer

t is drok  
veul volk  
veul mutskes  
sums n doukje  
om koale kop  
proaten honderd oet  
wisseln ervoarens oet  
veul spijd?  
veul ien bèr legen?  
nou is t eerst goud  
kinnen der weer tegen  
hopen op n goud woord  
van kankerdocter  
wat toch n roar woord  
mor t is wel woar  
hierveur binnen wie hier  
apmoal mit mekoar

Willy Westerdiek,  
Nijlaand



## JOA MIEJONG DOE OOK

Mit grood' en klain kukenspul  
 tjoekselden wie op 31 december 2010  
 t Olle mit t Nije Joar en champagne mit zuurtjeweater  
 Op t ènd van dizze nacht haar ik gain kopzere  
 mor d'aine docht dat zie Madonna was  
 en n'aander Harry Potter  
 Noa n nacht van rechtop dreumen  
 en valen en opstaan  
 konden wie op 1 jannewoarie 2011  
 bie t Nijjoarsbuffetje langes goan  
 Vief doagen laank n noflek-drokke familievekaanzie  
 Sjoelbrikken smieten – spellechies speulen  
 winnen of verlaizen –  
 moutwaark of vrij kaizen

Din op zèzze jannewoarie - op aigen stee  
 mit n pude vol goude veurnemens langzaam weer op glee  
 Biekommen - omenbie vief veur zeuven  
 mit TV Noord op ons nije flatscreen  
 Ik ken t nog nait leuven  
 Wachten en longern en longern en wachten  
 Aalweg heule wummelge nachten  
 Ik docht, winterpauze: hai het n nije winterhobby  
 Glühwein – après-ski im Kneipe oder hotellobby  
 Ook nog mit mien klaaine hazzens denken  
 hij wil nog even in baargen ribbeln en rodeln  
 of mit Bond tegen Harries in baargwaaiden jodeln  
 Dit is staarvenswoar n vergizzen  
 Elkenain ken zuk toch wel bedenken dat  
 van Grunnegs stipdiggeltje tot aan tiddelkeudel tou  
 hom zel missen  
 Spiedelk mor t is woar – veur elk en veur mie  
 Joa mijong doe ook – is veurbie  
 Wat dut e nou – ons guutjepuut – ons pengeltuut  
 ons grunneger tillevisieköster – ons grunneger 'boss'

HAARDSTIKKE BEDAANKT: OLAF VOS!!!!

Joyce Bodewes  
 Feberwoarie 2011

## Veujoar

Ien slichte lienen liggen lappen laand  
as deur n schiller tegen linnen streken  
heur aineghaid kins sikkom nait verbreken  
en stilleghaid wort stiller stil diskaant

aal vruchten liggen distied onner grond  
zai kieken oet noar eerste zunnegluien  
om loader liek n wonner groot te gruien  
tou eerabbels of aanswat ronnomrond

der ridt n boer mit trekker over t veld  
wil baiten doar liekoet op ainen zetten  
gain minsk zèl hom zien aarbaid ja beletten  
dat klaimse klaai is ales wat no telt

en boven aal wat gruit aan veujoarsvruchten  
dij Hogelandster strakke veujoarsluchten.

### Tiny Veldhuis

Oet bundel: "Pollerschaauw"



## Zummer

Bie zummerdag kin schiller doags ien tril  
om kleurenpracht mit kwast en vaarf te vangen  
dat korengeel en vaalglomrood en sangen  
maakt elknain bie tieden moeskestil

twij swaalfkes scheren as n vlaigmesien  
deur diekgat hìn, zigs boer hail gunner lopen  
van grode ploats stoan achterdeuren open  
drij kiener springen hoog op trampelien

wat wolken drieven laans op lije wiend  
wiedvot zigs aanbegun van dunnerkoppen  
boerin is heur bie t hooien aan verroppen  
t mout binnen weden veur schoer boudel vient

en boven ale riebe zummervruchten  
dij Hogelandster bonde zummerluchten.

### Tiny Veldhuis

Oet bundel: "Pollerschaauw"

## 'Zo gaat'.



Twij vraauwlu, n jonge en  
n middelboare, lopen stief  
aarmd over t stroatje noar  
t verzörgingsshoes.

'Most nait schrikken van dien omaatje hur',  
zegt oudere tegen jonge. 'Zai wordt slim ver-  
geetachteg. Ze belde net nog wanneer wie  
kommen zollen. Kiek, zai zugt ons al , ze  
zel deur wel zo open doun'.

'Och wicht , bist doe der ook bie, wat bin ik  
doar ja blied om, kom der mor gaauw in'.  
'Oma wis toch dawe kwammen', zegt ze  
verboasd. Heur moe stöt heur aan en fluus-  
tert: ' Gewoon derin mitgoan, nait tegen  
spreken, doar roakt ze allain moar van in  
ware'.

Ze goan zitten en dochter moakt thee.  
Omaatje kikt heur klaaindochter aan en  
zegt: 'Wat hest doar ja n mooie trui aan, n  
nije?'.

'Nee oma , dizze heb k al wel vaaier joar,  
zeker wel. Mor hai blijft mooi, was nait goud-  
koop mor din hè je ook wat'.

Oma knikt. Dochter schenkt thee in en vro-  
agt: 'Hebben wie der ook wat lekkers bie?'.  
'Kiek mor even wicht , k wait nait wa'k aal zo  
in hoes heb'. Ze kikt weer noar heur klaain-  
dochter en zegt: 'Wat hest doar ja n mooie  
trui wicht , nije? Staaie die goud hur. Lekker  
waarm ook zeker?'.

Klaaindochter kikt heur moe in keuken even  
mit n schaive mond aan. 'Joa hur oma, hail  
waarm, net goud veur dizze kòle doagen'.  
'Moe!', roupt dochter vanoet keuken ,  
zellen wie dij grode reep mit neutjes dailen?  
Dij kouk dij hier ligt is aalmoal oetdreugd, dij  
gooi k weg '.

'Joa wicht dû dat mor , tis mie ja goud', zegt  
t olske.

Zai draait heur gezicht weer noar heur  
klaaindochter en zegt bliede: 'Wat hest ja n  
mooie trui aan wicht, lekker waarm, hest dij  
zulf braaid?'.

Klaaindochter, mit n knipoog noar heur  
moeke: 'Nee oma , dat hebben joe ja doan ,  
joe hebben ja zoveul braaid in joen leven ,  
mooi hè '.

'Joa kind' en mit n stroalend gezicht gaat ze  
verder: 'Kleur kwam mie al bekend veur. Ik  
docht aal, mor k wast aalmoal vergeten.  
Roar toch?'.

Ze laggen aledrij mit volle mond.

Giny Hartman 24-2-11

## Geert Moatjes: Wat doen we hier en nou?



Geert zit ien zien aarmstoel, ien e koamer. Zo te zien het e niet veul ommaans. Gien boek of kraant ien e buurt, gien Sudoku, gien tillevisie of radio aan, nee, Geert zit noa te denken, te peinzen, te prakkizeren.... Dat doet e de leste tied wel voaker, beetje filosoferen over t Leven. Wat doen we hier en nou, woar moaken we ons druk om, "Wartoe zijn wij....", joa, zukswat. Dat krieg je as je older binnen asdat je wezen en wieten willen, dan zit t bewegen meer ie e hazens as ien e bienen. Geert viendt t apmoal mor moeilek, benoam as t om de problemen, om de knelpunten ie e grode en ien e lutje wereld gijt. Harmke was al n moal of wat deur de koamer hen dendert, mor Geert haar zuk deur heur alledoags gedrag niet ien e ruden brengen loaten. Wat is nou n slaang van e stofzuger die tegen zien knij kletst vergeleken bij de Kadafi-toestanden ien Libye? En dat Harmke höm n keer op e tenen trapt, dat is doch hiel wat aans as zo'n zelfmoordaanslag ien Kunduz? Of e de stroat achter t huus even aanvegen wil, de vogels moaken der n troep van, aal die resten van t vogelzoad en de sauskes.... Nou, dan moet Harmke mor es kieken goan ien Christchurch doar ien Nij Zeeland, as je dat zien dan doe je zulf doch gien mond meer open over de truttedheden thuus? Mor hoe je doar as gewoon dörpsmìns op leeftied met omgoan moeten... Joa, je kunnen wel ies wat geld stórten of ien e collectebus doen, mor of dat zoveul zoden aan e diek zet.... Doar ien Haïti hebben ze der ok nog niet zoveul van kloarmoakt en doar bennen ze al hoast weer aan n nije beving toe. En Iran? Neem nou Iran, dat is me doch ok n spultje van niks... Hebben ze doar niet zo laank leden n vrouw met n Nederlandse pas ophongen en bliksemsnel begroaven en nou willen ze heur niet meer terug vienden. Doar stoa je dan en as Rutte en Rosenkrans der niks aan doen kunnen, wat moet je dan as je as Geert Moatjes op e wereld kommen bent? En dan kan zien noamgenoot, die

Limburger met zien widde kuif, t wel over kopvodden, over boerka's hebben en over t verbieden van sharia's en zo, mor wat speelt die Wilders kloar doar ien Iran? Nul komma niks, die Ahmadinedinges die lust m rauw!

Harmke roept wat vanuut e keuken, mor Geert heurt t niet, het zien kop der niet bij, doár ien elks geval niet bij. Hij zit ien Kenya woar de homo's gien leven hebben en Baptistische veurgangers doodschoten worden, en in Ivoorkust woar ze met twéé presidenten der al hielemoal niks van bakken. Nou, je huuft ja niet iens zo wied vot te goan, neem nou Itoalië met die paljas van n Berlusconi die alleneg mor schiere greune bloodjes lust, n slecht gebit zeker. Ierland, IJsland... En Duutslant woar n minister zo groag doctor wezen wol dat e kramp ien e vingers kregen het van t overschrijven van teksten van anern... Tjongejonge, dan is t doch niet zo gek hier met die minkukel van n Verhagen die ballonnetjes op let en ze zulf deurprikt: CO2? Nee? Nee! Haar hij zulf nou mor wat meer ontspanning, wat meer om e kop ies flink op te schonen.... Tillevisie viendt e ok al niks meer aan. Zit e net met smoak n pizza met ananas op te eten, zo'n lap van t 3<sup>e</sup> Perron, dat bennen de beste, begunnen ze doar ien e rekloame op TV zo neudeg n WC schoon te moaken.... En dat voetballen, dat stelt ok niks meer veur. Die Fransen tegen Real Madrid, niks aan. En die anere Fransen tegen Mansjester, niet veul beter.... Van Gaal tegen Sneijder, doar haren ze ok alleneg mor de leste vijf minuten van speulen huft... Op wat veur voetbalvelden je ok kieken, je zien alleneg mor t iene Vreemdelingenlegioen tegen t anere speulen. Joa, ok ien e Euroborg. (Zien kameroad nuumt dat n voetbalkathedraal, veur Geert is t niet veul meer as n blok beton, woar de verwarming van kapot is...) Die foto ien e kraant bevöbbeld, van e hikhakkerij van Granqvist tegen Kah... Hoe Grunnegs is dat dan wel?

De koamerdeur vlugt open, Harmke drukt Geert de bezzem ien e hannen en wiest met heur duum noar achtern. Geert wiet genoeg. Hij gijt stoan, is verdorie doch wat stief worden. Gien woorden, mor doaden.... Feyenoord ien t rechter riegje, der is wat vrumds met dizze wereld!

Bé

## Oost of West – Wat moakt t oet/ uut?



Nee, ik hol t hier klaain, gain Grode poletiek, t gaait om Oost- en West-Grunnen, en om de toal dij doar proat wordt. (Nait t ABN, dat wordt 'sproken'). Dik twinteg joar was ik Oost-Grunneger, nou bin k al twij moal zo laank West-Grunneger. (Of ik nou ook meer as vatteg joar al Westerkwartierder bin? Zet mor n vroagtaiken...) Ik bin in en mit t Oldambtsters groot worden, mien voader- en mien moudertoal mit Midwolmer en Drijbörger aksenten. Pa en moeke hebben aaltied Grunnegs mit en tegen mie proat, en ook mit en tegen d'aander kinder. As t op de kop kreegst, was dat in t Oldambtsters ("Doe verrekte....") As der troost worden mos, of felisitaaierd of zokswat, doar wazzen Oost-Grunneger woorden veur: "Nou, hol nou mor op mit reren, zo slim was t ook ja nait!" Op kleuterschoule kwam ducht mie t ABN echt om t hörntje kieken en op legere schoule was der niks aans. Streektoal wer doar in klazze nait broekt, teminnent doar herinner ik mie niks van. Wel op schoulplaain, nait in klazze woar schoulmeester (Buikie, Proeme of Zonderman, mit 'meester' derveur) bie was. Dat ABN lag mie nait zo as proattoal, huil je je vanzulf stil, rustege klazzen bestonnen dou nog! Dou mien wereld oetbraaid wer mit ULO, was de leer- en lestoal ook allain mor t ABN, leroaren deden net of t 'dialect' nait beston, muite nait weerd om derover te proaten, derin al hailemoal nait... Op kweeschoule in Winschoot van t zulfde loaken n pak en nog slimmer. Bie oplaaiden tot schoulmeester heurde t Grunnegers wis en woarachteg nait, was meer n soort vergif. Ain van dij docenten, Westerhof, wol ons zölfs verbaiden om boeten schoule in pauzes Grunnegs te proaten. (En hai was ook nog wel van de PSP, mor dat anti-Grunnegs, dat heb k hom nait vergeven...) Dat verbaiden wer niks en wie hebben doch aalmoal schier ABN leerd. Op kweeschoule

was t wel de tied dat wie deurkregen dat t Grunnegers nait zo min was asdat t asmits leek. Aner leroar (Buning) het Hendrik Entjes noar schoul hoald, de 'waital' van t Nedersaksisch, veur n inlaaiden, doarover heb ik mien eerste tekst in streektoal schreven, veur de schoulkraande: "Entjes het der west..." Konst bainen wel breken over de komma's, mor t verhoaltje was nait ains zo slecht.

Dou k baaide bevoegdheden in buutse haar, kon k aan t waark in Zuudhörn. Eerst haar k nait ains zo in de goaten dat t Grunnegers doch wat aans was as aan oostkaande van pervinzie. (Al von k t wel vrumd dat kinder t aal haren over 'pieken' as ze hounder mainden, en over 'diesels' as wie op zuik wazzen noar hoanetoppen). Dou k in ploatselke poletiek aanlanden dee, heb k in n verkaizenskraande ook mor gewoon wat teksten in 'mien' Grunnegs schreven, ook weer mit n bult komma's, dou was Siemon Reker nog nait mit zien regelboukje teveyschien kommen. k Haar wel aal meer deur dat er grodere verschillen wazzen asdat ik docht haar, mor dat dee doch niks, je verstonnen mekoar ja wel...

Nou "Mien Westerkwartier" actief is (en ik neem aal mien hoofddeksels groag of veur Geert Zijlstra & Co, loat dat dudelik wezen!), is t net of der in t Westen van pervinzie gain Grunnegers proat wordt, t is ja "Westerketiers"... t Is zölfs zo gek dat je in West-Grunnen veur de Schriefwedstried van "Mijneigenbibliotheek" aigelks allain mor verhoalen, verskes of gedichten insturen kinnen in t Westerketiers, zo wordt doar de noadruk op legd. Dat vin k schane en aiglieks ook 'schande'. Streektoal hier in dizze kontraainen is ook Grunnegers, of je dat nou Westerketiers nuimen, of West-Grunnegers, t heurt bie dezulfde familie. Der lopen hier hail wat lu rond dij oet Noord- of Oost-Grunnen kommen en dij heur moudertoal mitnomen hebben. Vanzulf paas je dij toal wat aan. Ik heb t ook aal voaker over 'gebruken' in stee van 'broeken', of over 'thuus' en gain 'thoes'. Mor mien moudertoal nemt gainain mie of, ook nait in t Westerketaaier!

Jan Blaauw

## Herten vouern



Wat n klottenweer ! Ik dou de kroage van mien jaze nog wat wieder omhoog. Nait dat t veul helpt. Natte snij blif mie even-goud in t gezichte striemen. Of is t hoagel ? t Is kold en nat, dat is n ding wat zeker is. Even wat schillen noar de herten in t kamp brengen, docht ik. Je mouten der wat veur over hebben.

De herten zain mie al aankommen. Kopkes goan omhoog en as ze de plastic puut in mien handen zain, runnen ze votdoalek noar t hek. Ze lopen mit mie mit noar de vouer-bak en kinnen hoast nait wachten tot ik t lès-te beetje uut de puut schud heb.

Zie eten mie t brood uut d' haand Onnerwiel holden ze mie wel stief in de goaten. Ain verkeerde bewegen en zie stoeven weg.

Zie binnen aalmoal hier of in n aander kamp geboren, mor t blieden toch wilde daaier en zollen in de vrije netuur zo weer heur weg vinden.

De hounder hebben ook in de goaten kregen, dat ik der bin en kommen as n stel olle wieven oet t hok schommeln. De hoane veurop. Mor der is al niks meer over. Dat kin mie toch wel begroten. k Zel mor wat groan in t nachthok streuen. Zie stoeven derop of. Allent de jongste van t stel krigt aldernoarst op zien sodemieter as e ook wat mitpikken wil. Ik geef hom mor even wat apaart in t houkje.

Ik bin aaltied al gek mit daaier wèst. As kind al. Toun verzörgde ik al jonge vogeltjes dij wat te vroug uut nust valen waren.

Of mien neef kwam mie n jonge okster brengen dij e uut t nust in de hoge populieren bie de kleuterschool hoald haar.

Voak wui zo'n daaier nait zo old. t Dieet dat ik veurschreef was schienboar toch nait zo gezond veur hom.

Loater lukte dat beter, Toun ik n joar of twaalf was, kreeg ik weer es n okster van de buurman. Dij dee t meroakels goud op wurms, aaier van de doeven, en stukjes vlees dij de slachter veur hom mitnam. Hai dee t zingen van de zwaarte liester zo goud noa, dat dij hom ook weer antwoord gaf.

Ook het e proaten leerd. Mien pa haar s mörgens d' achterdeure voak open en huil den n hail gesprek mit t baist.

Nou ja, n gesprek mit waaineg woorden, t bleef bie "Haaaans dikkop !", mor den wel hail voak achter mekoar. Pa haar doar wel de slinger aan.

Joarenlaank heb ik ook postdoeven had en doar veul lol aan beleefd. Veuraal toun ik loater ook mitdee aan de wedvluchten.

Ik heb dus wel wat mit daaier. Zunder doar traauwens sentimenteel over te doun.

Der binnen minsen dij hail verboasd binnen as ik vertèl dat ik n hoane slacht heb en doar ook nog soep van kookt heb.

"Ain van dien aigen hounder ?", zèggen ze den.

"Joa, ain van mien aigen hounder. Dij het n goud leven had en dij smoakt ook nog es beter as zo'n diepvriesploffkip uut de supermarkt. En as ik drij hoanen heb, binnen de burenen doar ook nait bliede mit"

Ik denk dat zowat ons toch n beetje mit de paplepel ingeven is.

As klaainjong ston k der al bie te kieken as bie de burenen t zwien slacht wui.

En as ons kniene tegen de kerstdoagen dik genog was, ging pa hom ook slachten.

Ik heb doar bie mien waiten nooit trauma's van oplopen.

Mor juist daarom heb ik wel noadenken leerd over wat wel en wat nait kin in t omgoan mit daaier. Veul dingen dij k vrouger hail gewoon von, zol ik nou aans of nait meer doun.

t Veurnoamste is, dat je respekt hebben veur aal wat leeft en veur joen omgeven.

Minsen dij nait waiten woar melk weg komt, nog nooit zain hebben hou eerappels gruien, waiten voak sekuur hou t mout.

Boeren kriegen al gaauw de schuld van de "megastallen", t verpesten van t milieu, de veezaiktes en aal wat der verder mis gaait. Zie hebben doar aalmoal n mainen over en brengen dij mor wat groag noar veuren.

Mor de volgende dag goan ze weer noar Albert Hein, Aldi of de C1000 omdat doar de scholderkarbenoades in de aanbaiden binnen.

Den binnen ze even vergeten woar dij weg kommen.

As we nait mit ons zulf begunnen, zel t wel nooit beter worden op dizze wereld.

t Holdt op mit zachies regen. k Goa mor weer op huus aan.

Henk de Weerd

# KrEUZE

# OPROUP

Redaksie van K(R)EUZE is op zuik  
noar n NIJE

## TEKSTREDACTEUR (m/v)

vanof 1 maa 2011

### Waark:

In ontvangst nemen en, as t neudeg is, bewaarken van  
biedroagen veur rondzendbraif/webstee

Deursturen van de biedroagen noar opmoaker Henk de Weerd

Versturen van rondzendbraif as e kloar is (6 moal in t joar)

Van nije redakteur wordt verwacht dat e vuilt veur t Grunnegs in aal zien  
verschieningsvörm en dat e buusboukje van Siemon Reker onner handberiek  
het.

Wil je meer waiten?

Jan Blaauw: [jan@kreuzekeuze.nl](mailto:jan@kreuzekeuze.nl) (0594 503095)

Henk de Weerd: [henk@kreuzekeuze.nl](mailto:henk@kreuzekeuze.nl) (0594 504171)